

АБДУЛҲАҚ

ЧАЙҚАЛИБ ОҚМОҚДА ДУНЁ

Тошкент
«Янги аср авлоди»
2006

84(59)6-5 УЗБ, 82д, 242б.—


Шеърлар

Абдулҳақ — кўнгли шоири, армон ва ҳайратларнинг
нозиктаъб назмий мусаввири. Ҳар бир сўз, ҳар бир ифода
руҳият чақмоқларидай гулдурайди, сўнг ҳазин ёмгирга
айланади.

Аслида юрак ва вужуд муносабатлари шундай: гоҳ
портлайди, гоҳ мунграйди.

Ушбу тўпламга кирган шеърлар тушунган ўқувчисини
ўзи билан етаклаб олиб кетади, ўзгага шукӯҳ бахш этади.

32345
10 091



ISBN 5-633-01878-8

© Абдулҳақ «Чайхалиб оқмоқда дунё».

«Янги аср авлоди», 2006 йил

* * *

Эркам, бир кун маъюс кўнглим шодлармисиз?
Хаёлингиз хаёлимга отлармисиз?
Билмам, ўксиб эслармисиз, ёдлармисиз
Мажнунингиз йиқилса, ишқ чўлларида?

Лабимизга келинг лабни гулоб айлаб,
Исмимизга юрагингиз аъроф айлаб.
Дилкушоим, дийдамизни хуноб айлаб,
Кулга чўкдик айрилиқнинг йўлларида.

Ҳаётимдир лойқаланган сувга менгзаш,
Афғонли, ҳам нолали бир куйга менгзаш,
Йиғлармисиз, куярмисиз Сиз хун талаш –
Жон берсаг-ей Сиздек жонон қўлларида?

Кенг дунёнинг давронига сиғмадим мен,
Шундан қалбим тирнадим мен, тигладим мен,
Келармисиз, келмасмисиз, билмадим мен,
Абдулҳақнинг қирқларида, йилларида?

*Отда Францияга
бориб келган Зиёҳиддин
Мамажонов хотирасига*

Ҳинду сори юзланганча қолди отлар,
Кўзларига маржон айлаб дош — тоқатни.
Оҳ, нечундир юрагимга инди додлар,
Ногоҳ бугун қўмсаб Зиё Муҳаммадни.

Дунё — ёлғон, ёқтиргайдир эртақларни,
Кўнглин хушлар топтаб нозик чечакларни,
Кетгим келди, силтаб кетгум этакларни,
Ногоҳ бугун қўмсаб Зиё Муҳаммадни.

Элни домга тортгай алдаб дажжоллари,
Ҳақиқатга кўпик тутгай ғассоллари.
Тўшим тешар, совуқ соғинч шамоллари,
Ногоҳ бугун қўмсаб Зиё Муҳаммадни.

Адолатга кафан битган қотил дунё,
Итларига зарлар тутган қотил дунё.
Лахта қонга ботиб кетган қотил дунё
Ногоҳ юлиб кетдинг Зиё Муҳаммадни.

* * *

Гулим, букун узилди арқон,
Тегди ўткир тиг ришталарга.
Севгимиз ҳам букун бегумон
Айланди пок фаришталарга.

Соғинч гўдак болалар каби
Бетин инграр дилларимизда.
Алвон-алвон лолалар каби
Армон ўсар йўлларимизда.

* * *

**Тиконлар бир куни сиз гул бўлармисиз?
Муҳаббатга эгилган қул бўлармисиз?**

КИПРИК ҲАҚИДА ДОСТОН

**Кўзимга санчилган ҳар киприк —
Васлинг-чун қурилган бир кўприк.**

КЎЗИМ – АНҲОР

Кўзим – анҳор, дийданг чўмилган.

ҚАЛБИМ – ҚАБР

Қалбим – қабр, васлинг кўмилган.

* * *

Туманлар тизилар, тунлар тизилар,
Яшашдан асраган малакдай гўё.
Қўрқувдан чопаман, тушим эзилар,
Ўнгингда юракни эзгандай рўё.

* * *

Ичимга ютганча бор соғинчимни,
Ётибман шифтларга отиб тинчимни.
Сен томон жўнатиб қўйиб ногаҳон
Хокисор хаёлим – совчим, элчимни.

...Фақат сен меники эмассан, жоним.

М. Кенжабек

Қуюнларда қолган қалб меникидир,
Қалбларга чўғ солган қалб меникидир,
Бор дардларни олган қалб меникидир,
Фақат сен меники эмассан, жоним.

Ишқни кўкка элтиб, туғлаган юрак,
Туғларга бош қўйиб, йиғлаган юрак.
Йиғлаб бори корин тиғлаган юрак,
Фақат сен меники эмассан, жоним.

Дилларда гуллаган, сўлмаган чечак,
Хаёлларга ҳоким – чирмашган печак,
Эртақлар меники, меники — чўпчак,
Фақат сен меники эмассан, жоним.

Ширин сўзга ўчим, нозик ниначим,
Қомати хуш бичим, салга гиначим,
Бағримда «оҳ» чим-чим, гўзал «таъна»чим,
Фақат сен меники эмассан, жоним.

НЕКИ БЎЛСА ...

Тебраниб йиғладим, йиғладим тўйиб,
Хўрсиниб йиғладим, бардошим – зада.
Сиз ҳам бағрингиздан юбормай қўйиб,
Йиғладингиз менга қўшилиб, дада!

Бизни кўриб сабру соғинч йиғлади,
Кўникишлар ҳамда овунч йиғлади.
Сукунат йиғлади, йиғлади жимлик,
Неки бўлса бари нотинч йиғлади.

Қийнадим қалбим қийноқлари ё?
Эзилган юрагим ўйноқлари ё?
Тирнадими билмам кўксингиз бу кеч,
Мангу айрилиқнинг тирноқлари ё?

Соғиниб чопдими руҳингиз, билмам,
Ё озор топдими руҳингиз, билмам,
Бу дунёга сиғмай қийналганларим
Сезиб-илғабдими руҳингиз, билмам...

Оқди юзимизга соғинч томчилаб,
Ниҳоят тонг отди, тунни қамчилаб.
Дод солиб уйғондим, додлаб уйғондим,
Дилимни ташлади ўксиш қайчилаб.

Айрилиқ кўксига бошимни қўйиб,
Тебраниб йиғладим, йиғладим тўйиб.

* * *

Тун бўйи кездим дил тўла ғам,
Ҳар туним шундайин ўтади.
Аҳволим кўргач, оҳ, туннинг ҳам
Ранглари оқариб кетади.

* * *

Юрак чирс-чирс ёнар андуҳ ўчоғида,
Дил тилинар фоний дунё пичоғида.
Ҳам кўксида ухлар бу кун хаста руҳим
Ва тунар ғам хаста руҳим қучоғида.

* * *

Ўтди ёшлик, қолдим ғам — тоғ устида,
Сени ўйлаб дилим доғ-доғ устида.
Васлинг умидида ўтарман бедор,
Тунлари танларим тирноқ учида.

* * *

Тун.
Ухлайди барча-барча жим,
Шод-хуррамлик тун ичра ғижим.
Фақатгина мен уйғоқдирман
Ва уйғоқ хун — қасоскор иним.

* * *

Жимлик риштаси-ла боғлаб тилимни,
Ўтказдим умримни, ёшлик йилимни.
Тасбеҳ янглиғ ўтди кунларим тоши,
Беркилган кўчанинг очолмай бошин...


Қийнар портламаган исёнлар бари,
Кўзин ёролмаган куртак сингари.
Юрак қулоғига ғамлар най чалар,
Беҳудага кетган дамлар най чалар.

Тасбеҳ янглиғ ўтди кунларим тоши,
Беркилган кўчанинг очолмай бошин...

* * *

Қийнамоқда телбалик ёмон,
Тутмоқдадир илҳом жомини...
Оҳ, бир зўр шеър туғилса шу он,
Яшил умид қўяй номини.

Мана, золим илҳомим ёмон,
Қалбга отди тўлғоқ домини...
Туғилмаса гар зўр шеър шу он,
Яшил армон қўяй номини.



* * *

Ҳаётнинг ҳар аччиқ кунига кўниб,
Яшадим мен ўксиб, яна ўксиниб...
Кўларим ўнгида бормоқда аста
Бу рангли дунёнинг ранглари сўниб.

* * *

Йиғирма беш йил ухладим,
Туш кўрдим мен шунча йил, оҳ!
Уйғонишга кўпдир ҳали,
Туғилишга анча узоқ.

• • •

Ўртамизда туманли ғамлар,
Кўролмаймиз бир-биримизни.
Гулим, мана, ўтмоқда дамлар,
Ҳар кун қарғаб тақдиримизни.

Тегирмоннинг сангидек эзар
Ҳаётнинг кўп чиғириқлари.
Вужудимиз тинчини бузар
Юракнинг ҳар бир оғриқлари...

Орзуимиз рўёби қани?
Фақатгина қолди хаёлот.
Ўртамизда қайғу тумани
Тарқалмади бир умр, ҳайҳот!



Чечагим, чеҳрангиз ҳамон ўшадир,
Чеҳрангиз чаманга чирой қўшадир,
Интилиб, сарғариб, ғариб бўлдик биз,
Суйган кўнглимиз-чи, синган шишадир.

Олиб кетар Сизга хаёл – оқизоқ,
Бироқ бул йўлларда армондир тузоқ.
Билсангиз, бинафшам, мушкул чидамоқ.
Ўксишлар дилимда ипин эшадир.

Қаноти қайрилган қушмикан севги,
Билмам етиб бўлмас тушмикан севги,
Нишонга яралган тўшмикан севги,
Бир-бир отилган ўқ тўшим тешадир.

Оҳ, нигоҳингизда қотил ўқ яшар,
Шунданми, кўнглингиз доим тўқ яшар,
Бизнинг юракда-чи, ўчмас чўғ яшар,
Бул чўғлардан вужуд ёниб пишадир.

Юзларимда қолган оёқ изи бор,
Мажруҳ юрагимда тирноқ изи бор.
Бул бармоқларимни ёндиргувчи, оҳ,
Эҳ, бармоқларимда бармоқ изи бор.

Йиллар олиб кетди ҳушларимни-ей,
Ардоқлаган нозик ҳушларимни-ей.
Тилкалаб, поралаб руҳларимни-ей,
Кўксимда абадий пичоқ изи бор.

Суҳбатингни тинглаб қонмадим ўзим.
Талпиндим, топмадим, тонмадим ўзим ...
Кўкка етди, сенга етмади бўзим,
Кўзларимда тийрон қароқ изи бор.

Тўкилар руҳим ҳар сайраган найдан,
Ишқни қайта-қайта қайраган найдан,
Хаёлимни бетин ҳайдаган найдан,
Найларам, абадий чақмоқ изи бор.

Йўлларингни пойлаб, карахт бўлдим мен,
Сувларингга ташна дарахт бўлдим мен,
Сўқмоқларда қолган бебахт бўлдим мен,
Қалбимда топталган байроқ изи бор.

Юзларимда қолган оёқ изи бор,
Мажруҳ юрагимда тирноқ изи бор.
Бул бармоқларимни ёндиргувчи, оҳ,
Эҳ, бармоқларимда бармоқ изи бор.

* * *

Кўзларинг домига илиндим, Зебо,
Оҳ, нақадар теран, нақадар чуқур.
Бундан қутулмоқлик мушкулдир, аммо
Қутулмоқ истамас хаёлим учқур.

Бундан тортиб олма сочларинг билан,
Ютиб юборса ҳам майлига кўзинг.
Майлига, розиман бир умрга ман
Кўзларингда қолсам, бўлиб маҳбусинг.

* * *

Қоқар қайғу қошимда қанот,
Гуноҳкорман, гуноҳкор ўзим.
Бир умрга тиғ бўлса, наҳот,
Айтолмаган биргина сўзим.

Хотирамга тошларни отдим,
Ғам уясин тўзғитиб ногоҳ.
Хаёлимга миндирдим отлар,
Хаёлингга бўлсин деб ҳамроҳ.

Армонларим қаърига шўнғиб,
Яраладим минг бора дилим.
Юрак битди дардларга тўлиб,
Кечир, гулим, кечиргил, гулим.

Англадим мен барин кечикиб,
Чидай олмам энди ғашликка.
Соғинар дил зор-зор ичикиб,
Надоматлар бўлсин ёшликка!

ЖИДДИЙ ҲАЗИЛ

Вужудимда ғам-ғашлик
Қўйди бу кун болалаб.
Тунлар энди ухламай,
Чиқар дилни тимдалаб.

Қаранг, дўстлар, ғамларга
Танбур бўлди бул ичак.
Бешик бўлди юрагим,
Томирларим беланчак.

Бири келиб ўт қўяр,
Бири эса ўчиар.
Шундай қилиб вужудим
Не кунларни кечиар.

Бирин-кетин улғаяр,
Ёш етгани ўларлар.
Ўликларин шунда ҳам
Жигаримга кўмарлар.

Ўлат келгур ғамларга,
Ё раб, бир кун ютулгум...
Кириб охир қабрга,
Сўнг улардан қутулгум.

Қўнғир оқли қўнғироқли бир от келди,
Отни миниб ғам аталмиш ёв-ёт келди,
Тиқилганча бўғзимга-эй фарёд келди,
Қамалларда қолди қалбим, қолди қалбим.

Вужудимни тилкаламай пичоқ тиғи,
Юрагимга тиқилмайин унинг туғи,
Қутқар мени, Она буғи, Она буғи,
Қийноқларда қолди қалбим, қолди қалбим.

Нега бунча ёвларим-эй ёвуқ бўлди?
Кўрган куним бунчалар ҳам совуқ бўлди?
Қувонч қочди, йироқ бўлди, оҳ, йўқ бўлди,
Қабрларда қолди қалбим, қолди қалбим...



Юзларимга босилгандир соғинч лаби,
Бу лаблардан юрагимнинг тирриқ таъби.
Хазонрезда барглар хазон бўлган каби
Соғинчлардан киприкларим тўкилади.

Йиллар юзинг хаёлимга йўлладилар,
Икки кўзим кўзларингга чўлладилар.
Охир, мана, юзларимни хўлладилар,
Соғинчлардан киприкларим тўкилади.

Яшил умид яшиндек, оҳ, хазон бўлди,
Киприкларим ёшларимда маржон бўлди,
Томчи соғинч томиб-томиб уммон бўлди,
Соғинчлардан киприкларим тўкилади.

* * *

Муҳаммад Юсуф

хотирасига

Ўтиб бораётир бу умр — карвон,
Айлаб дил аталмиш кулбамни вайрон,
Муҳаммадсиз қолдик, Муҳаммадсиз-ей,
Нега йиғламайсан, аҳли Андижон.

Бағрингда бўй етган бўз боланг кетди,
Бургутинг ҳам лочин кўз боланг кетди,
Ўзгамас, ўзбегинг, ўз боланг кетди,
Нега йиғламайсан, аҳли Андижон.

Юлдузни йиғлатган ашъори қолди,
Бағри қон қизғалдоқ — алёри қолди,
Бойчечагу жайрон, гул — ёри қолди,
Нега йиғламайсан, аҳли Андижон.

Йиғлаб қолди бир қиз булоқ бошида,
Армон — ўкинчлари кўзин ёшида,
Ўкиниб-ўкиниб қабри қошида
Нега йиғламайсан, аҳли Андижон.

Учмоққа ўч эди учмоққа учди,
Улуғ Улуғбегин улуғин қучди...
Осмонингдан ёрқин юлдузинг учди
Нега йиғламайсан, аҳли Андижон.

Бу кун йўлбарсларга едиргум дилим,
Юрагим едиргум, едиргум тилим.
Кўкламойнинг кўкин сўраб бир чимдим,
Нега йиғламайсан, аҳли Андижон.

* * *

Жабрлар жонимга балолиқ бўлди,
Сўзлаган сўзларим бежолиқ бўлди,
«Тўғри сўзни» оғзи қийшиқ гапирди,
Ҳар ишники қилдим хатолиқ бўлди.

Ҳақ дея сўз урдим, сўзим йиғлади,
Кудуратдан кўкраб кўзим йиғлади,
Танамдан тоқатим, тўзим йиғлади,
Ҳар ишники қилдим хатолиқ бўлди.

Топиб, топинганим – сўзга юкиндим,
Қароқчи, ҳам қотил кўзга юкиндим,
Бўғзимни ёндирган бўзга юкиндим,
Ҳар ишники қилдим хатолиқ бўлди.

Оҳ, мағлуб бир байроқ бўлди бул таним,
Топталди, хок-тупроқ бўлди бул таним,
Таним кўксингда доғ бўлди, Ватаним,
Ҳар ишники қилдим хатолиқ бўлди.

Армон лашкарлари — голиб муғомбир,
Завқланиб дилимда чалдилар танбур,
Ўқиниб қабридан тик турди Бобур:
«Ҳар ишники айладик хатолиқ бўлди».

* * *

Шавкат Раҳмонга

Ғалаёнга тўла вужуддан
Охир дунё бўлдимми халос?
Ер остида ётибсиз, мана
Барча мўмин бандаларга хос.

Ўйчан кўзлар ўяди ўйим,
Лек бу кўзлар мангу яшайди.
Сизни ёдга олган чоғларим
Менинг дилгир дилим қақшайди.

Худо берган эзгу сўзингиз
Жон аталган жойга қадалган.
Қисқа, қора, қизиқ қисмат-ей
Наҳот Сизга, Сизга аталган.

Бўғзим бўғар бўғиқ бўзларим,
Икки дунё теварагида.
Сиз-чи мунгга тўлиб ётибсиз
Қулоқ солиб ернинг тагида.



Гулим, гул юзингиз тула изтироб,
Оҳ, кўзларингизга соғинч илашган.
Кечалари гоҳи мунг, гоҳида хоб
Киприкларингизда ўрин талашган.

Тинмайин тўрини тунлар ташлайди,
Бир нуқтага нигоҳ михлаб қоласиз.
Ўксишлар қалбингиз қамрай бошлайди,
Сўнг соғинчни қучиб ухлаб қоласиз.

Соғинч дилингизда гулдай очилар,
Димоғингизда бир ифор туясиз.
Ифор етти иқлим узра сочилар,
Сиз ифор кўксига жим бош қўясиз.

Бўғзингизда эса аламли унлар,
Армон осмонида хаёл – муаллақ...
Армонларга қалам ботириб тунлар
Сатрлар битади Сизга Абдулҳақ.

МУНДАРИЖА

«Эркам, бир кун маъюс кўнглим шодлармисиз?...»	3
«Ҳинду сори юзланганча қолди отлар...»	4
«Гулим, букун узилди арқон...»	5
«Тиконлар бир куни сиз гул бўлармисиз?...»	6
«Киприк ҳақида дoston...»	7
Кўзим – анҳор	8
Қалбим – қабр	9
«Туманлар тизилар, тунлар тизилар...»	10
«Ичимга ютганча бор соғинчимни...»	11
«Қуюнларда қолган қалб меникидир...»	12
Неки бўлса	13
«Тун бўйи кездим дил тўла ғам...»	14
«Юрак чирс-чирс ёнар андуҳ ўчоғида...»	14
«Тун...»	15
«Ўтди ёшлик, қолдим ғам — тоғ устида...»	15
«Жимлик риштаси-ла боғлаб тилимни...»	16
«Қийнамоқда телбалик ёмон...»	17
«Ҳаётнинг ҳар аччиқ кунига кўниб...»	18
«Йигирма беш йил ухладим...»	18
«Ўртамизда туманли ғамлар...»	19
«Чечагим, чеҳрангиз ҳамон ўшадир...»	20
«Юзларимда қолган оёқ изи бор...»	21
«Кўзларинг домига илиндим, Зебо...»	22
«Қоқар қайғу қошимда қанот...»	23
Жиддий ҳазил	24
«Қўнғир оқли қўнғироқли бир от келди...»	25
«Юзларимга босилгандир соғинч лаби...»	26
«Ўтиб бораётир бу умр — карвон...»	27
«Жабрлар жонимга балолиқ бўлди...»	28
«Ғалаёнга тўла вужуддан...»	29
«Гулим, гул юзингиз тўла изтироб...»	30

Адабий-бадий нашр

АБДУЛҲАҚ

ЧЛЙҚАЛИБ ОҚМОҚДА ДУНЁ

Муҳаррир А. Қутбиддин

Бадий муҳаррир Б.Бозоров

Тех. муҳаррир Е.Демченко

Мусаҳҳиҳ Н.Жабборова

Саҳифаловчи Н.Раҳимов

ИБ № 4177

Босишга 21.04.2006 й.да рухсат этилди.

Бичими 70х90 1/32. Босма тобоғи 1,0.

Шартли босма тобоғи 1,17. Адади 1000 нуска.

Баҳоси келишилган нархда. Буюртма № 93.

«Янги аср авлоди» нашриёт-матбаа марказида тайёрланди.

«Ешлар матбуоти» босмахонасида босилди.

700113. Тошкент, Чилонзор-8, Қатортол кўчаси, 60.